

Baluwa jhuubhele jha Pauli kwa Timocheyo Ulongolelo

Kitabo chuubhele cha Timocheyo ndi baluwa jhuubhele jhijhandikwe na ntenga Pauli kujhenda kwa mmola gwake Timocheyo. Baluwa jhuubhele Pauli kwa Timocheyo pange ikajhandikwe pahina na kujhomokela ughome gwake. Kipinde chenye, Pauli pakibha mu kipungo mu muche gwa ku Loma, mu chula jha 1:16. Pauli akibha nkoche jwa pahina hake na Timocheyo, na kipinde chenge ankemita ngita mwana mundo, Filemone, mu chula jha 2:22, Timocheyo 1:2; 1: 18.

Baluwa jhenje ndi jhimo jha baluwa ncheche ya Pauli yanyandikile mundo jhumo jhumo na chi kwa lilongo lya bhando bhibhannyeketii Kili-chitu. Baluwa henge itato ndi Timocheyo na Titu, na Filemone. Kipinde jha baluwa jhuubhele jha Timocheyo, piijhandikwa kwa lilongo lya bhando bhibhajheketii Kilichitu mu unahota nkolongwa gwa ku Loma pakibha na mang'ahe hake. Pange iwechekana ndi nhwalo ghuntehila Pauli abhe mu kipungo, na kunnobholela Timocheyo ahimbilile papeta mambu ghighajhundupa. Ngita chikibha mukitabo cha 1 Timocheyo, Pauli akankelewiye Timocheyo akichunge na bhabhola bhuwange, mu chula jha 1:16-18. Akanobholile hele Timocheyo napaha na kipinde cha mang'ahe palonge, mu chula jha 3:1.

Ghughabhii mukitabo

Mu chula jha 1:1-2, Pauli atumbuu baluwa jhake kwa kunnyambucha Timocheyo. Na kunaghalakii ilebhe ipalwa kubholwa, mu chula jha 1:3-18.

Yene annobholela Timocheyo mang'ahe ghigh-apakukolela na ahimbilile, mu chula jha 2:1-13.

Kabhele ikelebhuwa akoto kuhenga ghangandanela na kumpe ndela jha maha jha kuhenga, mu chula jha 2:14-26.

Pauli ikutila kwa kumpe malaghilo ghake Timocheyo, mu chula jha 4:9-9.

¹ Ne Napauli natenga jwa Kilichitu Yecho kwa kupala Chapanga. Ndumitwe ndangache ughome gwatulaghila Chapanga mu kulombana na Kili-chitu Yecho.

² Ninnyandikii mwe ma Timocheyo ma mwanango jhunimpahii hake.

Ninnyope kwa Chapanga Tate gwito na Kili-chitu Yecho Bhambo gwito ampele umbone na kiya na uteeke.

Uchengulo na malobhe gha kuleke mwojho

³ Ninchenguu Chapanga jhunintumikila kwa mwojho gwambone ngita chibhatehila akahoko bhango, ninchenguu kila pininkomboka machiko ghoha mu kunnyopa kwango kilo na muhe.

⁴ Pinikomboka maholi ghino mmi na kilolo hake kummona, kupala ndwele luhangano kumwojho.

⁵ Ndi punikomboka kihobholelo chino cha uchakaka, kihobholelo chakibhanacho mbujha gwino Loisi na hele majhe gwino Eunike. Manye

kubhehe helahela namwe nkwete kihobholelo chenie.

⁶ Nhwalo gwa gheniya nanikombocha nnyedelele kukihenge lihengo likitoi champii Chapanga machiko ghanimekila mabhoko gwango.

⁷ Nhwalo Chapanga atupii jhe Uhuke gwake jwatutenda tujhohope, nambo atupekiye Uhuke jwatupekeye makakala na mapalano na mwojho gwa kukilongocha tabhete.

⁸ Yene, mangakola jhe hone kwatangachii Bhambo gwito, kabhele mangakola jhe hone nhwalo gwango nenga jhundabhitwe mu kipungo kwa nhwalo gwake. Nambo uhimbilile mu malagho pamonga na nenga kwa nhwalo jha Lilobhe lya Mbone kwa kutangatilwa na makakala gha Chapanga.

⁹ Chapanga atukombwii, atukemite tutame utamo gwa unyahinyahi, chi nhwalo gwa itendwa hito yambone, nambo ngita chapahii jwenio Chapanga na kwa umbone gwake. Ngatupila umbone gwenio kupete Kilichitu Yecho kabula nnema nakupanganwa jhe.

¹⁰ Nambo umbone uyekulilwe hotuhotu kwito ngohe kwa kuhika kwa Nkomboche gwito, ndi Kilichitu Yecho. Jwenie ahangabhine makakala gha kuwegha na kwa ndela jha Lilobhe lya Mbone ngayekwila ndaa ughome gwa machiko ghoha gwangapeta.

¹¹ Chapanga ngahagwila ne mme natenga na mmola kwa nhwalo jwa kwatangachii bhando Lilobhe lya Mbone,

¹² gheniya ndi ghighameka naghe ngoheno.

Nambo ne nipwele jhe nhwalo chakaka niu manye hotuhotu jhuni hobholela, kabhele manye jwenie nambekeya ulonda, ade lichiko lela.

¹³ Nkamuu mbone mabholo gha uchakaka gh-inimmolite ngita kilandanikiho kwino. Nnyendelele mu kihobholelo na mapalano ghabhii mu kulumbana na Kilichitu Yecho.

¹⁴ Kilebhe chela chamaha mukilonde kwa makakala gha Uhuke gwa Chapanga jwaitama nkate jhito.

¹⁵ Ngita chiumanye, bhando bhoha bhubhabhii ku kilambo cha ku Asiya bhannekite, pakate jhabhe abhii Fugelo na Helimogene.

¹⁶ Ninnyopa Bhambo aikole kiya nyumba jha Onesifolo, kwa nhwalo akauhanganiche mwojho gwango pipipi. Ngolite jhe hone nhwalo gwa kutabhwa kwango,

¹⁷ pahikita tu ku kilambo chuku Loma, ngambaliya hake ade ngatukongina.

¹⁸ Ninnyopa Bhambo ankole kiya kwa lichiko lela luhadabulo pulupa kuhika! Na mwenga umanye twe ghamaha gphantendii kwenio ku Epecho.

2

Nkomana ngondo jwa kuhobholeka jwa Yecho Kilichitu

¹ Bhahe, mwe ma mwanango Timocheyo, mma na makakala mu umbone ghitupatite mu kulumbana na Kilichitu Yecho.

² Na mabholo ghunyohina nikatangacha palonge jha bhando twe, gheniya mabhola bhando bhibhahobholeka na bheniya bhihoto kwabhola bhando bhange.

³ Mwe nhimbilila malagho pamonga na nenga ngita nkomana ngondo jwaumbone jwa Kilichitu Yecho.

⁴ Nkomana ngondo jwabhii kungondo ihenga jhe mahengo gha ughome gwa kila lichiko nambo ihenga mahengo gha kungondo, kupala kunhalalicha nkolongwa jwa akakomana ngondo.

⁵ Helahela kwa mundo jhojhoha jwailongocha pumubhutuka mbelo ihoto jhe kupata hupo jha kubhutuka changakengama malaghalikilo ghigh-abhekwitwe.

⁶ Jwalema hake ipalwa atumbula kupata mahuno.

⁷ Mughabheka umwojho gheniya ghinilonge, nhwalo Bhambo nantenda umanya ghanga ghoha.

⁸ Munkomboka Kilichitu Yecho, jwayokichwe kuhumii mukuwegha, jawahumi mulukolo lwa Daude, ngita chililonge Lilobhe lya Mbone linitangacha.

⁹ Kwa nhwalo gwenio ne ning'ahika na ndabhitwe minyololo ngita namwiye. Nambo Lilobhe lya Mbone lya Chapanga litabhwa jhe minyololo.

¹⁰ Kwa yenio nihimbilii kila kilebhe ku nhwalo gwa bhando bhibhahaghulilwe na Chapanga, na bheniya hele bhapata ukomboche ghubhii nkate jha Kilichitu Yecho na kuleta ung'alicho gwa machiko ghoha ghangapeta.

¹¹ Lilobhe lende ndi la uchakaka,
“Anda tuhwii nako,
helahela natutama nako pamonga.

¹² Anda tujhendilile kuhimbilila,
natulongocha pamonga na jwenio.

Anda tunkanite,
na jwenio helahela natukana twenga.

¹³ Anda tuhobholeka jhe,
jwenie najhendelela kuhobholeka,
nhwalo jwenie ihoto jhe kukolowa.”

Nhenga lihengo jwajheketilwe na Chapanga

¹⁴ Bhahe, makombocha bhando bhino mihalo jhenje na kwakelebhuya palonge jha Chapanga bhakotoka kung'aulana kwa malobhe ghangandela. Mitaho jhene ihalalii jhe, nhwalo kilebhe chenye chahobhecha bhibhajhokanikiya.

¹⁵ Nkachane kuhenga ilebhe ihalalii Chapanga, mme maunhenga mahengo mambone jwangaikole hone lihengo lyake na kone abhola telatela malobhe gheniya gha chakaka gwa Chapanga.

¹⁶ Mme kutale na mihalo jha undindilima na jhangahalalii Chapanga, nhwalo jhene ujhendelele kwabheka bhando bhabhehe kutale na Chapanga.

¹⁷ Mabholo ngita gheniya ghiwanana ngita mabhanga ndela ghangalama lililye yegha. Pakate jha bhando jwabholita ilebhe yenio ndi Humeneyo na Fileto.

¹⁸ Bheniya bhailekite kutale ndela jha uchakaka, na ndi bhihangabhana kihobholelo cha bhando bhange kukulonge uyokecho kwa bhando bhoha upetite.

¹⁹ Nambo nchinga ghuchengwitwe na Chapanga ujhemite nganganga. Na panane jhake ghajhandikwe ghanga, “Bhambo abhamanya bhando

bhake,” na “Kila mundo jwalonge jwenie ndi jwa Bhambo, ndi alekane na uhakaho.”

²⁰ Munyumba ngolongwa ibhii jhe yombo ya madine gha feza na chaabo tugha nambo ibhii yombo ya mikongo na undope henge itopela na yangatopela.

²¹ Anda mundo akijhelehwiye na kubhehe kutale na yombo yenio yangatopela nabhaha chombu cha kuhenge mahengo gha kanjika, nhwalo akipihite na kutumika na Bhambo na akilenganikiye kuhenga kila lihengo lilibhii lyambone.

²² Mukibhambaye na tama mboho ya ungombo na ntame tela ngita chapala Chapanga, na mme kihobholelo na upalo na uteeke pamonga na bhando bhoha bhibhannyopa Bhambo kwa mwojho gwamaha.

²³ Mukibhambaye na mitau jhanganandela na jha umbebbhebhe, mabhene umanya kuhenga yenio kwileta bhulo.

²⁴ Ntumiche jwa Bhambo akomana jhe, ipalwa abhaha jwanuu kwa bhando bhoha, jawahoto kubhola na kuhimbilila,

²⁵ jwanuu pakelebhuya bhando bhibhako-mana, nhwalo bheniya Chapanga ahoto kwaghalambula na kuuleka uhakaho gwabhe na kuumanya uchakaka.

²⁶ Peniya, malango ghabhe ghabhujhii kabhele, na kupokonyoka muntambo gwa Jwanganandela jwabhajhonjite na kwatenda bhatende chapala jwenio.

3

Machiko ghukupehekela

¹ Nkomboka kubhehe mu machiko gha ghukupehekela ghapakubhehe ndi machiko gha malagho.

² Bhando nabhakupala bhene, nabhapala mbijha na bhibhakikweya na bhina ngandango nabhannigha Chapanga, na bhangajhokanikiya akatate bhabhe, na bhangaluchenguu na bhangannyinamii Chapanga.

³ Bhando bheniya nabhabha bhanga mapalano na bhangapala kujhelana na bhina uwange na bhahoto jhe kukilongocha na bhina ukale na bhangapala ghambone.

⁴ Bhando bheniya nabhabha bhibhajhambii bhajhabhe na bhihenga changaholelela na bhibhakiloka na bhibhakupala bhene kuliku kumpala Chapanga.

⁵ Kwa panja nabhabhonekana ngita bhando bhibhannomba Chapanga, nambo bhikana makakala ghake. Mkibhambahe hake na bhando ngita bheniya.

⁶ Pakate jha bhando bhangе bhijhenda munyumba jha bhando na kwakolowa akakeghe mandindilima bhibhatopilwilwe na mihigho jha uhakaho na bhibhalongochwa na tama mboho jha kila kilebhe.

⁷ Akakeghe bheniya bhijhigha kukibhola kila lichiko nambo bhihoto jhe kuhikii kuumanya uchakaka.

⁸ Bhando bheniya bhikana uchakaka ngita Yane na Yambule chibhankanila Mucha. Bheniya ndi

bhando bhibhahobhite mu malango ghabhe na bhakanilwe mu ilebhe ya kihobholelo.

⁹ Nambo nabhahoto ng'o kujhenderele hake nhwalo undindilima gwabhe naubhonekana hotuhotu kwa bhando bhoha, ngita chikibha kwa Yane na Yambule.

Malaghilo gha kujhomolela

¹⁰ Nambo mwenga ma Timocheyo, maghakengime mabholo ghango na matyangilo ghango na chimbala mu kutama kwango. Na hele mukikengime kihobholelo chango na kuhimbilila kwango na mapalano ghango na kulendele kwango,

¹¹ kubulwa kwango na kulagha kwango. Kabhele mughamanye ghighangolile kwenio ku Anti-yokiya na ku Ikonilo na ku Lusita. Ngaimbilila kulagha kwenio kukolongwa muno! Nambo Bhambo ngang'ombwila mugheniya ghoha.

¹² Kila mundo jwaipala kutama kwa kunhalalii Chapanga mu kulombana na Kilichitu Yecho nalagha.

¹³ Bhando bhanganandela na bhibhakoloya nabhajhenderelela kubhehe bhanganandela hake, na bhibhakoloya bhange na kongo bhene bhikopokewa.

¹⁴ Nambo mwenga nnyendelele kutama mu uchakaka gholu ghumolitwe punyeketila. Nhwalo mamanye bhala bhibhamolita,

¹⁵ na nkomboka kuhumii uhwana gwino mughamanye Majhandiko gha Chapanga gheniya ghahotwii kunete malango ghinnongocha mu ughombokeko kwa kuhobholela Kilichitu Yecho.

¹⁶ Majhandiko ghoha gha Chapanga ghabhii na Uhuke gwa Chapanga na ghahto kunyangatii kubhola chakaka na kukelebhuya na kulangii malemo na kwalongocha bhando bhatame maha palonge jha Chapanga,

¹⁷ mundo jwantumikii Chapanga abhaha na kila kilebhe chakipala mukuntumikii Chapanga na ahoto kuhenga mahengo ghoha ghambone.

4

¹ Ninaghalikii palonge jha Chapanga na palonge jha Kilichitu Yecho jwapakwahadabuu bhando bhubhabhii ghome na bhubhawile, nhwalo ihika kulongocha abhii Munahota Nkolongwa.

² Mwatangachila bhando lilobhe lya Chapanga, mpanganike kutangacha kwa kipinde chambone amu kipinde chambone jhe na mwapwatalila na mwakelebbhuwe na kwaleke bhando mwojho makabhola kukuhimbilila kwoha.

³ Nalihika lichiko bhando nabhajhokonikiya jhe mabhola gha uchakaka, nambo nabhakengama chibhakipala bhene na kukipalakiya akabhola twe nabhalongolela ghala ghighapala kujhoha mu machikilo ghabhe.

⁴ Nabhakana kujhokanikiya uchakaka, nabhaighalambukila omo yuwange.

⁵ Nambo mwenga mukichunge mu kila kilebhe, nhimbalila malagho nhwenge lihengo lya kwatangachii bhando Lilobhe lya Mbone na nnenganikiya maha lihengo lino.

⁶ Nhwalo nenga mmii pahina na kupiwa ngita litambiko lya kujhakana na kipinde chango chukuwe kibhandikile.

⁷ Ngomine ngondo maha, nnyomwii mwanja gwango na kihobholelo nikikamulii njelembo.

⁸ Ngohe nilende kupata ndweko jha kubhehe naumbone palonge jha Chapanga. Bhambo jwahadabula chiipalwa nambela ndweko jhene lichiko lyenie, ne tujhe nambo bhala bhoha bhibhalole kwa kilolo kubhujha kwake.

Pauli innaghii Timotheyo

⁹ Nkangamale kuhika kwa ne kajhombe.

¹⁰ Nhwalo Dema apahi ilebhe ya pannema pano nganekita nu kujhenda ku Tesolonike, ku Kelesike ajhahwii ku Galatiya na Titu ajhahwii ku Dalematiya.

¹¹ Luka tugha ndi jwabhii pamba pamo na nenga. Muntole Maluku uhike nako pamba, kwa nhwalo nahotola kundangatila mu lihengo lyango.

¹² Tikiko nintumite ku kilambo chuku Epecho.

¹³ Pampala kuhika ung'eghela likote lyango linekita kwa Kipulo ku kilambo chuku Tiloya, helahela unnetela itabo, achwa hela itengenichwe kwa limbendela.

¹⁴ Jhola punde kuyana Alekichanda andendi ghangandanela twe, Bhambo nannepa kwa ghala ghandendile.

¹⁵ Na mwe mukichunge na jwenio nhwalo akakanite lilobhe lito.

¹⁶ Pundumbwila kukengelela akibha jhe mundo jwajhemite upande gwango, bhoha ngabhanekita. Chapanga akoto kwabhalangila ulemo gwenio!

17 Nambo Bhambo ngatamita pamonga na nenga, ngambila makakala, ade nganhotwila kwatangachila bhando bhoha, kwa bhando bha ilambo henge bhajhohe, kabhele ngangombolilwa mu luhadabulo lwa kuwe ngita kunkombola munnomo gwa lihimba.

18 Bhambo nang'ombola na ghangandanela ghoha na kumbeleka njelembo ade munahota nkolongwa gwake jwa kunane kwa Chapanga. Ung'alicho ubhaha kwa jwenio kwa machiko ghoha ghangapeta! Amina.

Nyambuchilo jha kujhomolela

19 Majhambuche Pilichila na Akula, pamonga na bhando bhubhabhii ukajha kwa Onesifolo.

20 Elasito ngahighalika ku Kolintu, na jwenio Tilofimo nganinekita ku Mileto, nhwalo atehila kulwalwa.

21 Nnyombihane kuhika kabula jha kipepo kinahika jhe.

Ebulo na Pude na Lino na Kilaudiyo na akalongo bhange bhibhannyeketii Kilichitu bhinyambucha.

22 Bhambo atame na mwenga.

Ninnyope mabhoha umbone gwa Chapanga.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3